

Alfons Tuor e sia ovra litterara

Nova publicaziun dall'ovra cumpleta edida da Renzo Caduff

DA PAUL DUFF / ANR

■ La sala dil hotel Greina a Rabius ei s'emplenida tochen il pli davos plaz la dumengia vargada suentermezdi. Ils retardai han stuiu star sin peis. Quella gronda fuola d'interessents documentescha igl interess vid l'ovra dil poet Alfons Tuor e la reconuschientscha ch'el gauda aunc 111 onns suenter sia mort. Il cudisch da Renzo Caduff arva a nus novas portas e lai endriescher fatgs intims ella veta dalla famiglia dils Tuors. Quei lubescha d'emprender d'enconuscher era in'otra veta dallas ovras dil poet romantic religius.

Suffrientschas e tema d'existenza

«Alfons Tuor, poesias», quei num porta il niev cudisch. La Chasa Editura Rumantscha presenta in'ovra bein retschercada e documentada cun commentaris ed explicaziuns digl'autur dil cudisch Renzo Caduff. Già en sia lavur da licenziat all'Universitad da Friburg eis el sefatschetaus cul poet da Rabius ed igl onn vargau aunc pli intensiv ch'antruras. Il portret biograf d'Alfons Tuor dat in sguard sin la situaziun economica dalla famiglia da purs da muntogna. Las brevs, per part tschentadas en manuscret, relatan dil fastedi dil bab Gion Antoni per ina buna existenza per siu fegl Alfons. El supplichescha siu fegl da surpender ina piazza e secuntentar sco telegrafist, ligiacudischs ni signun. Aschi deplorabel che fegl Alfons ha buc anflau piazzas stablas ei quei fatg staus da gudogn per la litteratura romontscha, alla quala el ei sededicaus duront s'entira veta. En siu lungatg matern ha el schau in relasch tgemblaus dad ovras litteraras a nosa societad romontscha. A Paris ed a Londra eis el



Il Chor mischedau Rabius ha embelliu la fiasta dalla vernissascha dil cudisch niev. La canzun «Allas steilas» ha impressiuun sco adina.

FOTO P. DUFF

staus e frequentau leu studis allas universitads. Duront quei temps egl jester lontan ha el buca sulet pitiu dalla malsogna maligna, vitier ei aunc vegniu il mal dil schar encrescher. Quels profunds sentiments ha el descret en poesias lamentontas e trestas. Alfons Tuor ha suffriu sia entira veta ed ei morts cun mo 33 onns ils 19 da mars 1904.

En pliras poesias satiricas demuossa Alfons Tuor sia vart humoristica e critica enviers autoritads ni societad. Quei porta ad el zuar empau critica, mo negin remiers da cunscienza. Ils rehuns da Londra pren el sils corns ed apropro corns, la historia dil schnech da Medel deriva era ord sia plema. Ina survesta cronologica da tuttas publicaziuns, da sias staziuns e dimora da studis dat survesta clara dall'activitad dalla cuorta veta. Atras sia

veta e si'ovra ei da sentir ina profunda religiusadad. Mudergiaus da mals ha Alfons Tuor anflau sustegn, confiart e gronda speranza ella cardientscha. Il confess da siu credo ed il schem da siu pitir ein d'anflar ella pli renomada poesia «Allas steilas».

Admiraziun e reconuschientscha

La Cumissiun da cultura da Rabius ha mess sin peis ina digna fiasta a caschun dalla vernissascha dil niev cudisch. Anita Capaul dalla Chasa Editura Rumantscha ha engraziatur per la spontanitad demussada dils da Rabius. Ella ha engaschau Ormar Seiler per menar la fiasta ed el ha fatg quei cun in fin sensori ed ina spontanitad adequata. Il Chor mischedau da Rabius ha delectau ils presents cun canzuns da viarva romontscha d'Alfons

Tuor. Aposta per quei di ha siu dirigent, Gabriel Derungs, cantau in engraziament al poet indigen tenor la melodia «va, clo-ma sur muntognas».

Armin Candinas, president communal da Sumvitg, ha sutlingiau la luschezia ch'els hagien d'haver in aschi renomau antenat en vischnaunca. Ina fontana regorda dil grond poet e siu crap fossa ei postaus el santeri da Rabius.

Ei dat denton pli significonts monuments per in'autur che craps, quei ha Leo Tuor pretendiu. Il crap sa negin prender cun sesez ni tschentar el regal, denton in cudisch ha plaz en mintga valischa e sin mintga cruna en stiva. Il cudisch che vegn legius ei il ver monument per il poet. Cun siu fin sensori ha Leo Tuor engartau detagls zuppai el cuntegn dallas brevs denter bab e fegl. Quellas lingias

autenticas laian sminar la dispeta ch'els dus havevan appartenent il viver. Las fotografias relatan medemamein la posiziun patriarcala dil bab ella gronda famiglia cun nov affons. «Mintgin da nus ha Alfons Tuor en sesez!» pretenda Leo Tuor fagend attents sin dispetas, plaschers e suffrientschas dalla veta. Siu fervent giavisch als presents, mo era als Romontschs en general: «Cumprei il cudisch, legi el ni silmeins mettei el sin cruna.» Quella cunzina han biars presents suandau ed ein i a casa cun las poesias d'Alfons Tuor sut bratsch ni en tastga.

Il cudisch «Alfons Tuor, poesias» da Renzo Caduff sa vegnir retratgs tier la Chasa Editura Rumantscha, www.chasaeditura.ch ni en tuttas librerias. Ulteriuras presentaziuns: 20-01-2016 Biblioteca cantunala Cuera, 15-03-2016 al colloqui romontsch dall'Universitad da Turitg, edifici principal.

Davide penitente e Missa brevis in F

Il Chor Surselva ha entschiet sia sfida da concert

■ (anr/abc) Il project Mozart sa entscheiver – ed el ha entschiet cun vigor. Dacuort han cantaduras e cantadurs instradau cul dirigent Rest G. Tuor las emprovas pil concert che ha liug primavera proxima. Tut fuvu mess fil en guila. Rest Giuseppe Tuor haveva tscharniu il program, reservau igl orchester ed era ils solists fuvan informai. Muncava mo aunc il chor. Gliez fuvu aunc il punct malsegir. Gest lez, igl essenzial. Per cantar ina messa ed in oratori sacral da Mozart drova ei tuttina in pulit diember da cantaduras e cantadurs. Era in comite da project fuvu seformaus, tal haveva entschiet gia la stad a s'occupar cun in preventiv. Cantar il «Davide penitente» e la «Missa brevis in F, KV192» da Wolfgang Amadeus Mozart ei ina pulita sfida. Ina roscha perunas dalla Surselva e d'utro ha retschiet invits, a cantaduras e cantadurs anteriurs han ins fatg gust da separticipar.

El haveva survegniu avunda da messas

Tgi ch'ei arrivau dacuort all'emprema emprova dalla dumengia sera a Glion ha surstau buca pauc: Rondun 60 cantaduras e cantadurs, bein reparti els registers, han entschiet cull'emprema emprova dil project da Mozart. Il dirigent Rest G. Tuor haveva ordavon mess el clar ch'ins sappi realisar il project mo cun in diember sufficient da gliued. E la gliued ha seschau intimar dil program. Tuts ch'ei stai surstai positiv dil chor ch'ei seformaus. Pil 260avel onn da naschientscha da Wolfgang Amadeus Mozart presenta quel igl avrel 2016 duas da sias ovras sacralas. Inaga-



Motivai pil 260avel anniversari da W. A. Mozart: Cantaduras e cantadurs dil Chor Surselva han entschiet il project culs concerts digl'avrel 2016.

FOTO A. BEELI

da ei quei il «Davide penitente KV 469» ch'il scheni austriac ha scret a Vienna. 1782, suenter haver bandunau Salzburg – nua ch'el stueva cumponer ad incuntin ovras sacralas pigl arzuestg – haveva el entschiet a Vienna a cumponer ovras profanas. El haveva survegniu avunda da messas. Tuttina ha el entschiet a Vienna a scriver ina messa en c-moll ch'ei denton ida en truchet. Treis onns pli tard ha la «Wiener Tonkünstler-Societät» empustau ina messa dad el. Mozart ha priu neunavon il manuscret dalla messa en c-moll ed ei sete-

nus vid quella cun scriver igl oratori. Il text talian sereferescha als psalms da David. La musica bunamein mistica cumbina il stil d'ina opera cun ina ovra sacrala.

Tuttina ina messa

Il «Davide penitente» en talian per chor, orchester e solists cuoza strusch 50 minutas. Aschia ha il dirigent tscharniu ina ulteriura ovra digna che sa vegnir cumbinada. Fans da Mozart vegnan a selegar dalla «Missa brevis in F» en latin. Il chor vegn a presentar quella medema-

mein cuagl orchester Le Phénix. A caschun dall'emprema emprova ella sala dalla casa pervenda catolica a Glion han cantaduras e cantadurs retschiet las partituras ed ein s'approfondi l'emprema gada en omisduas ovras. Tuts ch'ei stai surstai dil tun dil chor e digl effect ch'ei fa da cantar Mozart. Parts ruasseivlas sebrattan cun fugas, ins sto seconcentrar e dumbrar tacts. Ritmicas cun sedischavlas e notas entiras pretendan ch'ins suondi attentamein l'emprema. Dad ussa naven tochen tiels concerts igl avrel 2016 s'entaupan las 60 cantaduras

e cantadurs als exerczis. Avon, e quei aunc uonn, ha il Chor Surselva dus ulteriurs termins. Sco quei che Renata Gienal, la presidenta dil chor, ha informau ei il chor presents cun in stan alla fier d'advent da sonda, ils 28 da november a Glion. In meins pli tard, ils 28 da december separticipescha el al marcau da Daniev lumnezian che ha liug uonn ad Uors. Omisduas gadas han ins caschun da discuerer cullas cantaduras e culs cantadurs dil project Mozart cun beiber in punsch e far viva sil bien gartegiar dil project.